

大乘阿毗達磨雜集論述記卷第二十四

唐京兆大慈恩寺沙門窺基撰

治行所緣者略說有五種。謂多貪行者。緣不淨境。多瞋行者。緣修慈境。多癡行者。緣眾緣性諸緣起境。憍慢行者。緣界差別境。尋思行者。緣入出息念境。何故多貪行者等緣不淨等修治行所緣境耶。由此能息除增上貪等故。

治行所緣中。如大論二十六七卷廣說。乃至有六種不淨等。尋之。并十六持勝。斯名勝行。

善巧所緣者。略有五種。謂蘊善巧。界善巧。處善巧。緣

起善巧處非處善巧。處非處善巧應云何觀。應如緣起善巧觀。問緣起善巧處非處善巧有何差別。答若以諸法流潤諸法令離無因不平等因生故是緣起善巧。謂以無明等諸法流潤行等諸法。非彼諸法無因而生。亦非自在天等不平等因生。如是觀智名緣起善巧。因果相稱攝受生起故是處非處善巧。謂雖唯有法爲因。然由攝受相稱因方能生起相稱果。如善行感可愛異熟惡行感不可愛異熟如是。如是觀智名處非處善巧。

善巧所緣如大論二十七廣釋。決擇文見之未得

忘

淨惑所緣者。謂下地麤性。上地靜性。眞如及四聖諦。下地麤性。上地靜性者。依世間道說。由此制伏諸纏。故眞如及四聖諦者。依出世道說。略故眞如廣故四聖諦。由此永害諸隨眠故。

淨惑所緣如大論二十七廣釋。彼唯有六行四聖諦而無眞如。彼問云何謂此諦。唯諸聖者以此爲實。苦集等聖者實知名爲聖諦。愚夫不能實知故。論文其如十六行者。如上法師云眞如謂正智觀。四諦謂後得觀。先聞法師釋謂正智觀唯作二無

我不別緣四諦唯一真如。既斷四諦義說爲十六行。如前第九卷初會釋約詮說爲四諦義亦無違。復次因辯觀察契經等法。應當解釋諸法道理。由依此道理能觀彼法故。

道理有二。初標後辨。

問。若欲於諸法正勤審觀察。由幾種道理能正觀察耶。

辨有二。初問後答。

答。由四種道理。謂觀待道理。作用道理。證成道理。法爾道理。

答中有二。一標二辨。

觀待道理者。謂諸行生時。要待眾緣。如芽生時。要待種子時節。水田等緣。諸識生時。要待根境作意等緣。如是等。作用道理者。謂異相諸法各別作用。如眼根等爲眼識等所依。作用色等境界爲眼識等所緣。作用眼等諸識了別色等。金銀匠等善修造金銀等物。如是比證成道理者。謂爲證成所應成義。宣說諸量不相違語。所應成義者。謂自體差別所攝所應成義。諸量不相違語者。謂現量等不相違立宗等言。法爾道理者。謂無始時來於自相共相所住法中所有成。

就法性法爾。如火能燒水能爛。如是等諸法。成就法性法爾。如經言。眼雖圓淨。空無有常。乃至無我。所以者何。其性法爾。

四道理如攝論廣明無異。

復次於諸法中正勤觀察四道理已。云何而起尋思。謂起四種尋思。一名尋思。二事尋思。三自體假立尋思。四差別假立尋思。名尋思者。謂推求諸法名身句身文身自相皆不成實。由名身等是假有。故觀彼自相皆不成實。事尋思者。謂推求諸法蘊界處相皆不成實。由諸蘊等如名身等所宣說事皆不成實。是故

觀彼相不成實。推求者是觀察義。自體假立尋思者。謂於諸法能詮所詮相應中推求自體。唯是假立。言說因性能詮所詮相應者。謂此二種互爲領解。因性所以者何。善名言者。但聞能詮。由憶念門便於所詮。得生領解。或但得所詮。由憶念門便於能詮。得生領解。於如是種類共立相應中。眼等自相。唯是假立。但於內團等名言因中起此名言。故若如是觀察。是名自體假立尋思。差別假立尋思者。謂於諸法能詮所詮相應中推求差別。唯是假立。名言因性。所以者何。以於能詮所詮相應中推求。若常無常有。上無上有。

色無色有見無見等差別相唯是假立名言因性如是觀察是名差別假立尋思復次於法正勤修尋思已必於諸法得如實智云何而起如實智耶謂起四如實智一名尋思所引如實智二事尋思所引如實智三自體假立尋思所引如實智四差別假立尋思所引如實智名尋思所引如實智者謂如實知名不可得智事尋思所引如實智者謂如實知事相亦不可得智自體假立尋思所引如實智者謂如實知實有自性不可得智差別假立尋思所引如實智者謂如實知實有差別不可得智此四如實智如前所尋

思了知名等如實皆不可得。

分別尋思如實智此大有異非二乘能有如攝論廣起位次第體如決擇分善以慧爲自性同時五蘊如理準思大論七十二廣明五法中云如實智正智所攝尋伺分別所收法師云若依攝論等尋思在煖頂實智在忍第一法決擇分善是有漏云何實智正智收義曰此約後得智說後得智亦作尋思如實觀以實智鄰近見道收又釋大義曰尋思位智未決定實智位智已決定實智爲正智收非尋思也有何差別顯揚第十六卷云於尋思中

前一離觀能詮所詮別觀故。後二合觀能詮所詮  
同一自性差別觀。若義不爾。何有色等名。故顯揚  
論云。此名爲此義。故於此事中建立。爲令世間起  
相見言說故。若不立色等名言。諸世間無有取知  
是色等。以起執故。故有言說。知爲實事。成如實智。  
乃至廣說。徧計所執諸法體不可得。非有性。不可  
言說。自性成就非無性。由勝義故。非有色。依世俗  
故。假立色乃至有無色門。盡當知。問。何故尋思中  
名事不言假立。自性差別帶假立言。義曰。以初二  
別觀不言假立。後二合觀。故假立言。又初觀未爲

假立。但觀不相稱。後觀但爲假立。大義未知。問。論  
文自性假立中。初言能所詮相應。中後言但於肉  
團等名言中起此名言。故者。此爲二釋。如所詮  
爲能詮名之因。故起名言。不言名言爲所說。因前  
解言爲所詮。因後解所詮爲言。因故。便別解。未必  
用二文義。又眼等自性以下。雖文唯結所詮爲言。  
因下名言。因義有更互爲因。義釋曰。由色爲名言。  
因故起此名言。此謂所詮爲言。因言卽是因。由與  
所詮爲因。故起此名言。此乃言爲所詮。因熟細尋  
文。餘準類解。於尋思中以知名等不可信。已有智

生何故如實智位。方言如實智。前雖有智未決定。於此智起方得決定。乃至四智等出體。如理準思。初二是方便。次一是煖頂忍。

尋伺實智各三。初標。次辨。後結。

復次依法修三摩地者。瑜伽地云何。

五瑜伽有二。初問。後答。

當知此地略有五種。謂持任鏡明依。

答有三。一標。二辨。三配因果。

持者。謂已積集菩提資糧。於煖等位。依諸聖諦。所有多聞。如所多聞安立止觀所緣境。故說名為持。又已

積集菩提資糧者。為求諦現觀聽受契經等法。故名多聞。任者。謂緣此境。如理作意。由此作意。依所多聞。無倒思惟所聞義。相任持心。故鏡者。謂緣此境。有相三摩地。此三摩地。即緣多聞為境。與定相俱。故名有相。相由此三摩地。猶帶所知事。同分影像相。故又此三摩地。能審照察所知事。質故。譬於鏡。明者。謂能取所取。無所得智。由此智見道所攝現觀轉故。

辨中為五。古解初四。四善如次。今解不然。初二是欲入善根方便。鏡在煖頂。明在忍。第一法。故或鏡在初三。明在第一法。

云何菩薩依瑜伽地方便修學證無所得

解明問答中初問云何修學於見道中證無所得  
非問第一法印二無得後答中初明資糧第一劫  
滿次明聞法持如理作意任二方發等持等持已  
下始引煖頂忍第一法故知持任前根方便。

謂諸菩薩已善積集福德智慧二種資糧已過第一  
無數大劫已聞隨順通達真如契經等法如理作意  
發三摩地依止定心思惟定中所知影像觀此影像  
不異定心依此影像捨外境想唯定觀察自想影像  
爾時菩薩了知諸法唯自心故內住其心知一切種

所取境界皆無所有所取無故一切能取亦非真實  
故決了知能取非有次復於內捨離所得二種自性  
證無所得依此道理佛薄伽梵妙善宣說菩薩依靜  
定觀心所現影捨離外塵想唯定觀自想如是內安  
心知所取非有次觀能取空後觸無所得。

答文有二初解後證解中初解初位第一劫修後  
解持任等四於中初解後引經。

依者謂轉依捨離一切麤重得清淨轉依故當知此  
中以因果兩位釋瑜伽地由持等四種釋此地因最  
後一種釋此地果。

次持任鏡明依中前四在決擇分位。後一是見道。前中三是世第一法。下問答內文中是次地前後。二見道。論文言前四是此地。因後一是果者。以明是地。又釋第四明亦是地前。如論文可知。泰法師云。引大莊嚴論與此同。真諦師釋入第二僧祇。初僧祇滿心語。故言超過第一。非卽入彼第二僧祇。如等覺三祇內。仍言等覺菩薩超過三僧祇。豈卽是佛位。居僧祇外。意欲釋依入初地故。如從由先積集已。方入見道。故有超過之言。非不是初僧祇內。如餘處。此第一法等居勝解行位。攝論解五種。

覺地中勝解行地者。謂初阿僧祇。企耶修習業分。勝解勝解。既居見道前。初僧祇劫。世第一法。卽在此中顯。故乃言第二僧祇劫也。又除能取論云。既以位判。與所取別除。問曰。所取實塵。無非實有。由心起執。境從心起。塵既無有。見心亦無。卽同時除。何故言別時除。義曰。當除所取之時。能取之心。非有所取。徧緣。而能取心。亦已先除。爲境從心生。故未以觀心觀。能取無後至忍等。方以智觀。能取非有。如是次第。餘如攝論及疏廣釋。

△第三大段文義善善巧等中有二。初明善巧。後明安。

住。

復次云何於諸法中善巧。云何義善巧。云何文善巧。云何辭善巧。云何前際後際密意善巧。如是五問隨順經中所說諸句。如尊者阿難告舍利子。長老當知。若諸苾芻成就五法。卽能速受多受善受。受已不失。於此經中卽由五法。如其所應成速受等四種句義。云何法善巧。謂多聞故。於法善巧。便能速受。由具多聞者。多分能速受文句差別故。云何義善巧。謂於阿毗達磨毗奈耶中善知其相故。於義善巧。便能多聞受。若善了知阿毗達磨等相。乃於蘊界處等所說事。

中便能攝集眾多文故。云何文善巧。謂善知訓釋文辭故。云何辭善巧。謂能善知我所等世俗言辭。不深執著隨順說故。若於文辭俱得善巧。便能妙善領受所說善知訓釋文辭故。善知我所等世俗言辭。不深執著隨順說故。卽能無倒領受文義。云何前際後際密意善巧。謂能善知於前際領受於後際出離故。若於前際後際密意善巧。便能受已而不失壞。依止前際所受法。後能證得出離故。由善了知如來密意。便能證取聖教堅實。

初中有三。初釋論師爲五問生下。次答引經。由五

成四法。後別顯之。

第五善巧謂前際等者。此中大意由前世修習領受力故。後身便得出離涅槃。自悟如來方便密意。云何於諸法中安住於法。

安住中初問。後答。

若不得修慧。唯勤方便修習聞思。不得名為安住於法。若不得聞思。唯勤方便修習修慧。亦不得名安住於法。若俱得二種方便安住。如是乃名安住於法。

答中有三。初論家自釋安不安住。

如經言。大德當知。若諸苾芻如是住法。乃可名為住。

法苾芻於此經中。世尊顯示若能具依聞思修住。方名住法。非隨住一方。便修習得名住法。若唯於法受持讀誦。爲他宣說等。是名聞思所生慧。如說若於是處多究其文。讀誦宣說。又多尋思。唯修聞思。慧不修。修慧捨離。瑜伽等。不可建立爲住法。若修三摩地方。便不知足。是名修所生慧。如說若有不得聞思。唯修修慧。亦不可立爲住法。

次如經言。大德當知。下引經釋安不安住。乘文便故。先釋安。後釋不安。

是故世尊因住法苾芻說如是言。若苾芻於法究竟。

所謂契經應頌乃至廣說已後復說言不捨瑜伽如是等應如理知若有具得聞思修慧依二種住是名住法。不捨瑜伽如是等者謂修三摩地方便不知足顯示修所生慧。三摩地方便者謂無間殷重方便及無顛倒方便。此則顯示二種方便。一無間殷重方便所攝。如說不捨瑜伽故。二無顛倒方便所攝。如說不捨作意故。不知足者謂不生味著修上奢摩他方便。如說不捨內心奢摩他故。此則顯示不生味著故。及修上奢摩他方便故名爲不捨。

後是故世尊因住法苾芻下引經釋成前住法義。

有三。初引經證。若有具得下論結。不捨瑜伽下牒釋。

△第四大段明菩薩藏法中文復有六。初廣明名體。第二明乖違方廣。第三釋方廣密意。第四明了決方廣。第五明方廣果。第六明方廣生福。初中有二。初明自體。後明方廣名。明自體中有二。初略。後廣。略中初問答波羅蜜多藏。後問答說處。復次何因緣故。十二分聖教中方廣分名菩薩波羅蜜多藏耶。

初問中間何因緣故。十二分教之中方廣一分名

菩薩波羅蜜多藏也。波羅蜜多行也。藏者教也。因方廣分名波羅蜜多之教也。據實諸分非不此藏。方廣全故所以徧說。

由此分中廣說一切波羅蜜多數故。相故。次第故。釋辭故。修故。差別故。攝故。所治故。功德故。更互決擇故。問於何處說。

廣釋中有二。初問。後答。

答。如經中說。大乘者卽是菩薩波羅蜜多藏。云何宣說波羅蜜多數相次第乃至更互決擇。數有二種。一計算數。二決定數。計算數者。謂六波羅蜜多。決定數

者。謂波羅蜜多數。唯有六。不增不減。何以故。一切菩薩道略有二種。一增上生道。二決定勝道。如其次第。三三攝故。所以者何。增上生道有三種。一大資財。二大自體。三大眷屬。施波羅蜜多。感大資財果。戒波羅蜜多。感大自體果。由持淨戒。生善趣中。得尊貴身故。忍波羅蜜多。感大眷屬果。能行忍者。一切眾生咸所歸附故。決定勝道有三種。一伏諸煩惱。修習善品方便。二成熟有情方便。三成熟佛法方便。如是三中。隨闕一種。菩薩決定勝道必不成就。成熟有情方便者。謂靜慮波羅蜜多。依此發神通成熟有情故。復次波

羅蜜多是無住處涅槃方便故其數唯六。所以者何。由諸菩薩爲翻住涅槃故於生死中攝增上生爲翻住生死故卽於生死而不染汙是故前三是得增上生方便後三是不染汙方便隨其所應如前應知。不染汙方便者由精進故修習對治。由靜慮故伏諸煩惱。由智慧故永害一切煩惱。隨眠復次爲攝益一切有情故對治一切煩惱。故波羅蜜多唯有六種。所以者何。菩薩摩訶薩由布施故引攝資財方便攝益一切有情。由持戒故不起侵損逼迫惱亂方便攝益一切有情。如其次第不毀壞他財身心故。由忍辱故堪

受侵損逼迫惱亂方便攝益一切有情。由堪忍他侵損己財等故。由此三種善能攝益一切有情。由精進故雖未永伏一切煩惱而依善品修彼對治。由靜慮故永伏煩惱。由智慧故永害隨眠。由此三種善能對治一切煩惱。

六度福慧相攝門。智度論等多論不同。更問廣辨。且如此中論文云。由勤故修習對治。由定伏惑。由智斷惑種。此中據實義解。如八道七覺等中種種不同。略如前會。其餘相收更待思問。

相者。謂諸菩薩波羅蜜多相。云何施波羅蜜多相。謂

諸菩薩安住菩薩法性菩提心爲依止。以悲導心捨一切時所有身語意業。如是由種姓故。願故意樂故。事故。自體故。顯施波羅蜜多相。種姓者。謂菩薩法性願者。謂菩提心。意樂者。謂悲導心。事者。謂捨諸所有自體者。謂身語意業。

於中二門。初明五相。後明四相。唯識有七。同解深密。攝論有六種相。菩提心中收。此中有五。第五三業自體非相貌是體相二種合說。唯識攝論等但說相貌。所以不取體體自有別門故。又善三種一巧便勝二。迴向勝三。清淨勝此三願中收。故以別

出體故此合也。又唯識論不言種姓。唯說六者二乘無性。應成到彼岸。又以後說四相。明不定迴向等。

施相中種姓。謂法爾種性。願謂發菩提心。卽有種姓。此通餘五。如仁王經。性在十行。施自體如文。以三業爲體。或有以慧爲體。據實是無貪善根性。初三業及慧出體者。此上出體非約實自體爲論。如下第十二卷說六種體。其定慧中先辨自性。後相求故。

云何戒波羅蜜多相。謂諸菩薩安住菩薩法性菩提

心爲依止。以悲導心受持一切菩薩戒時。所有身語意業。云何忍波羅蜜多。相謂諸菩薩安住菩薩法性。菩提心爲依止。以悲導心堪忍安定。受諸怨苦時。所有身語意業。云何精進波羅蜜多。相謂諸菩薩安住菩薩法性。菩提心爲依止。以悲導心引發一切勝善法時。所有身語意業。云何靜慮波羅蜜多。相謂諸菩薩安住菩薩法性。菩提心爲依止。以悲導心起一切種身語意業。自在用時。所有一切心恆安住。云何慧波羅蜜多。相謂諸菩薩安住菩薩法性。菩提心爲依止。以悲導心起一切種身語意業。自在用時。所有一

切諸法簡擇。復次。若所施行。依止薩伐若性能感薩伐若性。攝受薩伐若性能爲一切薩伐若事。是名施波羅蜜多相。如是四句。隨其次第。由起故。習氣故。自體故。等流故。顯波羅蜜多相。

四相中初二。因於果慧毗鉢舍那。謂觀汎簡於止。般若謂因中智。彼薩般伐。謂果中之智。

四種薩伐若中。言道中能感定者。前五定感其慧。發起者。謂依止一切智性。凡所生起一切修行。皆迴向薩伐若性故。習氣者。謂能感一切智性。卽所行施熏修相續於當來世。能感薩伐若性故。自體者。謂攝

受一切智性。卽所行施究竟圓滿。爾時能辦佛法身故。

言自體者。乃至卽所行施究竟圓滿。此中二意。一義曰。以因中行施時。由慧力故。後成一切智時。其一切智種。以施共成一切智。故說施能生一切智性。二義曰。智種子自是慧生。據增上緣。施能助成。就法身故。亦名自體。依智度論釋鉢羅若謂。理相後二果體用相。此中據果圓。因中亦分得。如理應思。

等流者。謂能爲一切一切智事。從此後時。由受用變化身等流門。發起一切薩伐若事故。如施波羅蜜多相。乃至慧波羅蜜多相。皆應如是說。次第者。謂前前波羅蜜多。能爲後後所依止。故所以者何。菩薩摩訶薩。由施波羅蜜多。串習捨施。內外事故。不顧身命。棄大寶藏。受持禁戒。由護戒故。他所毀罵。終不反報。由如是等。遂能堪忍。以能堪忍。寒熱等苦。雖遭此緣。加行不息。發勤精進。精進方便。證究竟果。成滿靜慮。靜慮滿已。由淨定心。如實知故。證得出世究竟大慧。復次。前前波羅蜜多。後後所持。故謂戒能持施。乃至慧能持靜慮。由具尸羅。施得清淨。何以故。由行布施攝。

益有情由具尸羅不爲惱害是故菩薩於受施者以  
離惱害善能施與清淨樂具故。由淨戒力施得清淨  
如是由忍力故戒得清淨何以故。由能忍受他不饒  
益終不毀犯所學處故。由精進故忍得清淨何以故。  
由勇猛力故。久處生死不以爲難。能受眾生違逆等  
苦。由靜慮故精進清淨何以故。由喜樂俱能勤修習  
一切善法無休息故。由具慧故靜慮清淨何以故。若  
由無量門數數觀諸法能證內寂靜增長三摩地。又  
伽陀說。無有靜慮而不因慧。復次由麤細故。波羅蜜  
多前後次第所以者何。於諸行中施行最麤故。先建

立於忍等行。戒復爲麤故。次建立。乃至於慧靜慮爲  
麤。一切行中慧爲最細。故最後立。釋辭者。謂諸菩薩  
所行布施所以名施波羅蜜多者。謂由大施故。離過  
故。離垢故。名施波羅蜜多。

釋通名中如攝論二復次解深密等。文中有二。初  
釋其詞。後釋不共。其中有五復次。

大施者。盡捨一切內外事故。長時施故。離過者。遠離  
不平等追求等過故。

釋詞離過中言遠離不平等追求等過故者。如下  
最勝中合當方便最勝此謂求惡因自在天等過

故。

離垢者。永斷一切所治慳故。如無盡慧經施無盡中說。云何離垢。永斷所治并習氣故。

無盡廣慧經。卽大般若後六會也。

如是三句顯波羅蜜多三種最勝何等爲三。一自體最勝并積習。二方便最勝。三果最勝。積習者。謂長時施故。如施波羅蜜多有三種。乃至慧波羅蜜多亦爾。戒等離過者。謂遠離我增益等。隨其所應。如無盡慧經廣說。

又戒等離過中謂遠離我增益等者。此有二釋。一

義曰。由持戒故能遠離增益我心。非持諸狗等戒。二義曰。唯言戒等離過。遠離增益。以施後有戒。故次言戒等。此下慧偏簡取釋。增益執則慧過邪。故言隨其所應。如大論慧除增益損減。故知是慧過。如攝論第七亦作是說。此等與此無違。遠離我增益等者。謂諸持戒令我解脫。我是增益故。邪忍邪精進等皆準此知。

復次由與十二種最勝相應故。名波羅蜜多。何等名爲十二最勝。一廣大最勝。不求一切世間樂故。又最上故。

十二段中不求世樂。出凡夫。又最上。出二乘。彼大果故。今解求世樂行最爲大。

二長時最勝。經三大劫。阿僧企耶所積習故。三所爲最勝。爲利益安樂。一切有情故。四無盡最勝。由迴向大菩提。究竟無盡故。五無閒最勝。由得自他平等勝解。令諸有情於施等波羅蜜多速圓滿故。

無閒勝中。古云利自他無閒缺。今利無離阻閒隔。故令他施果。或由自他無二。所以修無閒常時也。如廣大第一常故。

六無難最勝。唯由隨喜他所行施等。令波羅蜜多速

圓滿故。

無難勝中。由過去隨喜施等。不爲障故。所以無障難。

七大自在最勝。由得虛空藏等諸三摩地。令布施等波羅蜜多速圓滿故。八攝受最勝。無分別智所攝受故。九發起最勝。謂解行地中上品忍位所行施等波羅蜜多。

發起勝中。唯言上品忍者。以世第一法。唯一念不可分行。又無可形。唯上忍位時長。有下可形。故論說離二取相故。

十證得最勝。謂初地中所得施等波羅蜜多。十一等流最勝。謂八地中所行施等波羅蜜多。十二圓滿最勝。謂第十地及如來地所有施等波羅蜜多。如其次第菩薩圓滿故。佛圓滿故。復次最勝所作故。最勝所至故名波羅蜜多。一切佛菩薩所爲所到故。

第三復次最勝所作蜜多勝作義故。卽作行彼岸。又蜜多勝到義。卽到果彼岸。

復次到所知岸故名波羅蜜多。安住佛性故。

第四復次到所知彼岸。此當攝論第五教彼岸。雖行能離橫。以教爲先故。

復次濟度自他最極災橫故名波羅蜜多。能令自他越度生死大苦海故。其辭已釋。不共今當說。能捨施者當來貧苦。能捨受者現在熱惱。故名爲施。能令諸根永寂靜故。能趣清淨諸善趣故。能爲清涼所依處故。說名爲戒。隨其次第。能引守護諸根門故。是往清淨善趣因故。能爲無悔等漸次乃至涅槃所依故。遠離一切忿熱灰故。

不共詞解戒中有二清涼。一涅槃名清涼。故論云涅槃所依。二戒卽清涼。故論云遠離一切忿熱灰故。大論八十三言與清涼義相應故。

遠離不捨怨害心故。顯發損者常安隱故。說名爲忍。怨害心者。謂起報怨心。不捨者。謂不棄此心。能壞怨心。名爲損者。顯此無畏故。名顯發損者常安隱故。損害生長作用相應故。名精進。損害作用相應者。謂前二正斷。以能損害不善法故。生長作用相應者。謂後二正斷。以能生長諸善法故。能持能息。能靜能調。又能引發故。名靜慮。能持者。謂於境繫心。能息者。謂息諸散亂。能靜者。謂令心寂靜。能調者。謂制伏諸纏。能引發者。謂能引發自在作用。他所發智故。內證智故。種別智故。得寂靜智故。勝德智故。名爲慧。他所發智

者。謂從他言音所生慧。及如理作意相應慧。內證智者。謂出世間慧。種別智者。謂出世間後所得慧。得寂靜智者。謂修道中治煩惱慧。勝德智者。謂能引發勝功德慧。

說不其中他所發智。從他言音。慧是聞慧。如理作意。是思慧。修慧卽內證智攝。所以不別說。又解。下如理作意攝。又解。初爲隨信行三慧。後爲隨法行三慧。

云何修。

六到彼岸者十門別釋。上已四門修爲第五。初問。

後答。

略有五種謂依止任持修。依止作意修。依止意樂修。依止方便修。依止自在修。

答中初標後牒釋。

依止任持修復有四種。一依止因修。謂由種姓力於波羅蜜多修習正行。二依止報修。謂由勝自體力於波羅蜜多修習正行。三依止願修。謂由本願力於波羅蜜多修習正行。四依止簡擇力修。謂由慧力於波羅蜜多修習正行。依止作意修亦有四種。一依止勝解作意修。謂於一切波羅蜜多相應經教起增上勝

解。二依止愛味作意修。謂於已得波羅蜜多見勝功德起深愛味。三依止隨喜作意修。謂於一切世界一切有情所行施等深生隨喜。四依止喜樂作意修。謂於自他當來勝品波羅蜜多深生願樂。依止意樂修。復有六種。謂由無厭意樂。廣大意樂。歡喜意樂。恩德意樂。無染意樂。善好意樂。故修諸波羅蜜多。

依止意樂修中有二。初標列。後別釋。

依止意樂修中明六意樂。如攝論具三作意。此愛重作意。謂愛重此六種意樂。受功德味。二隨喜作意。謂隨喜六種意樂。三欣樂作意。謂欣樂自他六

種意樂。行六到彼岸。願我與此。恆不相捨離。及轉增勝。六意樂皆具。三作意如攝論第七卷廣明。此論初明無厭。次明廣大意樂。彼論初明廣大。次明無厭法體。二論不同。立名各有異意。彼論約奉施如來。從初發心。乃至成佛。一一剎那。捨一切身命。一一剎那。於熾火中。常乏諸具。一切威儀。行六波羅蜜。無有厭足。約一一剎那。故捨一切義。初名廣大。其實亦是無厭足。則此以無閒修。亦名爲長時。意樂卽無厭足異名也。此論約徧捨施一切有情。猶無厭足。卽前體上約義不同。名無厭意樂。卽長

時之異名。約長時修習。遠至菩提。無一剎那有退斷等名。爲廣大無差別。論第四名恩德。彼論名荷思。此異名也。施有情時。不希報恩。當來異熟名無染。是此論意。迴施有情。皆得勝果。是名大志。是彼論意。此論不希有情報恩名無染。彼論約有情自得勝果名大志。第六彼名純善。此名善好。此異名也。此六意樂。近六到彼岸。一一作意。皆通意樂。故亦近六到彼岸。其餘少分。大有不同。文繁稍異。所以不引。六意樂三作意攝。一愛重。二隨喜。三欲樂。此中菩薩於施波羅蜜多。無厭意樂者。謂諸菩薩於

一有情一刹那頃。假使殫伽沙等世界滿中七寶。以用布施。又以殫伽沙等身命布施。如是布施。經殫伽沙等大劫。如於一有情所如是。乃至於一切有情界。如是施時。皆令彼於阿耨多羅三藐三菩提。速得成熟。修行如是差別施時。菩薩意樂。猶不厭足。如是意樂。是名菩薩於施波羅蜜多無厭意樂。又諸菩薩修行如是施波羅蜜多時。展轉相續。無一刹那有退有斷。乃至究竟坐菩提座。如是意樂。是名菩薩於施波羅蜜多廣大意樂。又諸菩薩修行如是施波羅蜜多時。於施所攝諸有情所生大歡喜。是諸有情施所攝

受。雖生歡喜。猶不能及。如是意樂。是名菩薩於施波羅蜜多歡喜意樂。又諸菩薩修行如是施波羅蜜多時。觀施所攝一切有情於我已身有大恩德。不見己身於彼有恩。由資助我阿耨多羅三藐三菩提故。如是意樂。是名菩薩於施波羅蜜多恩德意樂。又諸菩薩修行如是施波羅蜜多時。雖於無量諸有情所興大施福。而不希報恩。當來異熟。如是意樂。是名菩薩於施波羅蜜多無染意樂。又諸菩薩修行如是施波羅蜜多時。以所修行廣大施聚所得異熟。施諸有情不自爲己。又以此福共諸有情。迴向阿耨多羅三藐

三菩提如是意樂。是名菩薩於施波羅蜜多善好意樂。又諸菩薩修行戒波羅蜜多乃至慧波羅蜜多時。無厭意樂者。謂諸菩薩假使經於殫伽沙等生。是一生。殫伽沙等大劫壽量。於此長時。諸資生具常所匱乏。三千大千世界滿中熾火。恆在其中行住坐臥。唯能修習一刹那戒波羅蜜多。或乃至慧波羅蜜多。如是展轉差別修習。所有戒聚乃至慧聚。究竟滿足。現能證得阿耨多羅三藐三菩提。是諸菩薩修行如是戒波羅蜜多乃至慧波羅蜜多時。於此戒聚乃至慧聚。修習意樂。猶不滿足。如是意樂。是名菩薩於所

修習戒波羅蜜多乃至慧波羅蜜多。無厭意樂。又諸菩薩修行如是戒波羅蜜多乃至慧波羅蜜多時。展轉相續。無一刹那有退有斷。乃至究竟坐菩提座。如是意樂。是名菩薩於所修行戒波羅蜜多乃至慧波羅蜜多。廣大意樂。又諸菩薩修行如是戒波羅蜜多乃至慧波羅蜜多時。於此所攝諸有情所生大歡喜。是諸有情由此所攝。雖生歡喜。猶不能及。如是意樂。是名菩薩於所修行戒波羅蜜多乃至慧波羅蜜多。歡喜意樂。又諸菩薩修行如是戒波羅蜜多乃至慧波羅蜜多時。觀此所攝一切有情於我已身有大恩。

德不見己身於彼有恩。由資助我阿耨多羅三藐三菩提故。如是意樂。是名菩薩於所修行戒波羅蜜多。乃至慧波羅蜜多。恩德意樂。又諸菩薩修行如是戒波羅蜜多。乃至慧波羅蜜多時。雖於無量諸有情所興大戒福。乃至慧福。而不希報恩。當來異熟。如是意樂。是名菩薩於所修行戒波羅蜜多。乃至慧波羅蜜多。無染意樂。又諸菩薩修行如是戒波羅蜜多。乃至慧波羅蜜多時。以所修行廣大戒聚。乃至慧聚所得異熟。施諸有情。不自爲己。又以此福共諸有情。迴向阿耨多羅三藐三菩提。如是意樂。是名菩薩於所修

行戒波羅蜜多。乃至慧波羅蜜多。善好意樂。

別釋有二。初釋施。後合釋餘五。第六差別有二。初問後答。

依止方便。修復有三種。謂由無分別智。觀察三輪。皆清淨故。所以者何。由此方便。一切作意。所修諸行。速成滿故。依止自在。修亦有三種。謂身自在。故。行自在。故。說自在。故。身自在者。謂諸如來。自性受用二身。行自在者。謂諸如來。變化身。由此能示現一切有情。一切種同法。行故。說自在者。謂能宣說六波羅蜜多。一切種差別。無有滯礙故。

依止方便修中。法師云。依止謂無分別智。方便謂地前地前學地上無分別三輪。故言方便。又依止方便卽無分別智。以此爲方便。三輪得清淨。又因正智與果正智爲方便行。三輪清淨。故能得果滿。故次明依止自在。言三輪者。法師云。二釋。一曰身語意清淨名三輪。二曰施者受者及所施財物名三輪。

大乘阿毗達磨雜集論述記卷第二十四